

LUFTSCHLOSS



Es isch Sunntig Nomidaag und d'Sunne heitzt so richtig
Nur die chüeli Bryse lost's e chly erträglich sy
In dr Shtadtrandwiise gönn ych mir chly Rue
Verträumt lueg ych am Himmel däm Schauschpiil zue
Chlyni wyssi Wolgge löön sich trybe vom Wind
Baue us bizarre Gschalte Figure wo gigantisch sinn

In den Auge bländed d'Sunne s'duet scho fascht wee
D'Ummriss sinn verschwumme doch irgendwie do gseeni mee
D' Wolgge verschmelze im Sunneliecht zumene Koloss
Ufem Gipfel erhebe sich Dürm und Dächer vo mym Schloss
Ich fang a wyter baue Shtäi für Shtäi
S'Door goht uff und ich füül my sofort Dehei

Im Innehof bilde Süüle us Marmor e Galerie
E schnee wysse Brunne laded mii zum Baden yy
E'breiti Shtääge wo my zmitzt in Palascht yne dreit
Die hälli chüeli Halle öffnet d'Ruggwand gross und breit
Ych lueg in die blai Unändlichkeit und bau e'Ziehbrugg bis zum
Mars
Do bysst mi in dr Nase won ych d'Auge uf mach liig ich im Gras

Es isch Sunntig Nomidaag und Sunne heitzt so richtig yy
Nur die chüeli Bryse lost's e chli erträglich sy
In dr Shtadtrandwiise gönn ych mir chly rue
Verträumt lueg ych an Himmel und grieg nit gnue

S U I S A ® Dieser Text ist Urheberrechtlich geschützt. Das öffentliche Aufführen Kopieren, sowie Bearbeiten bedarf der schriftlichen Genehmigung.